

四庫全書

集部

欽定四庫全書

集部

石倉歷代詩選卷四

詳校官庶吉士臣范逢恩

侍讀臣孫球覆勘

總校官進士臣朱鈐

鈐

校對官中書臣嵇承志

承志

謄錄監生臣高鏡

鏡

欽定四庫全書

石倉歷代詩選卷四

明 曹學佺 編

晉詩二

陶淵明

停雲四章

停雲思親友也
得湛新醪園列初榮願言不從歎

息滿襟

靄靄停雲濛濛時雨八表同昏平路伊阻靜寄東軒春
醪獨撫良朋悠邈搔首延佇

停雲靄靄時雨濛濛八表同昏平陸成江有酒有酒閒
飲東窗願言懷人舟車靡從

東園之樹枝條再榮競用新好以招余情人亦有言日
月于征安得促席說彼平生

翩翩飛鳥息我庭柯歛翮閒止好聲相和豈無他人念
子實多願言不獲抱恨如何

時運四章

時運游暮春也春服既成景物斯和偶影獨游欣
慨交心

邁邁時運穆穆良朝曩我春服薄言東郊山滌餘靄宇
暖微霄有風自南翼彼新苗

洋洋平津乃漱乃濯邈邈遐景載欣載矚稱心而言人
亦易足揮茲一觴陶然自樂

延目中流悠悠清沂童冠齊業閒詠以歸我愛其靜寤

寐交揮但恨殊世邈不可追

斯晨斯夕言息其廬花藥分列林竹翳如清琴橫牀濁
酒平壺黃唐莫逮慨獨在余

榮木四章

榮木念將老也日月推遷已復有夏總角聞道白
首無成

采采榮木結根于茲晨耀其華夕已喪之人生若寄顛
顛有時靜言孔念中心悵而

采采榮木于茲託根繁華朝起慨暮不存貞脆由人禍
福無門匪道曷依匪善奚敦

嗟予小子稟茲固陋徂年既流業不增舊志彼弗舍安
此日富我之懷矣怛焉內疚

先師遺訓余豈云墜四十無聞斯不足畏脂我名車策
我名驥千里雖遙孰敢不至

酬丁柴桑二章

有客有客爰來爰止秉直司聰于惠百里食勝如歸聆

善若始

匪惟諧也屢有良由載言載眺以寫我憂放歡一遇既
醉還休實欣心期方從我遊

荅龐參軍六章

龐為衛軍參軍從江陵使上郡過潯陽見贈

衡門之下有琴有書載彈載詠爰得我娛豈無他好樂
是幽居朝為灌園夕偃蓬廬

人之所寶尚或未珍不有同愛云胡以親我求良友實

觀懷人歡心孔洽棟宇惟隣

伊余懷人欣德孜孜我有旨酒與汝樂之乃陳好言乃著新詩一日不見如何不思

嘉遊未數誓將離分送爾于路銜觴無欣依依舊楚邈邈西雲之子之遠良話曷聞

昔我云別倉庚載鳴今也遇之雪霰飄零大藩有命作使上京豈忘宴安王事靡寧

慘慘寒日肅肅其風翩彼方舟容裔江中勗哉征人在

始思終敬茲良辰以保爾躬

歸鳥四章

翼翼歸鳥晨去于林遠之八表近憇雲岑和風不洽翻
翻求心顧儔相鳴景庇清陰

翼翼歸鳥載翔載飛雖不懷遊見林情依遇雲頡頏相
鳴而歸遐路誠悠性愛無遺

翼翼歸鳥馴林徘徊豈思天路欣及舊棲雖無昔侶衆
聲每諧日夕氣清悠然其懷

翼翼歸鳥戢羽寒條遊不曠林宿則森標晨風清興好
音時交贈繳奚施已卷安勞

遊斜川

辛丑歲正月五日常氣澄和風物閒美與二三隣
曲同遊斜川臨長流望曾城魴鯉躍鱗于將夕水
鷗來和以翻飛彼南阜者名實舊矣不復乃為嗟
歎若夫曾城傍無依接獨秀中臯遙望靈山有愛
嘉名欣對不足率爾賦詩悲日月之遂往悼吾年

之不留各疏年紀鄉里以記其時日

開歲候五日吾生行歸休念之動中懷及辰為茲遊氣
和天惟澄班坐依遠流弱湍駛文魴閒谷矯鳴鷗迴澤
散游目緬然睇曾丘雖微九重秀顧瞻無匹儔提壺接
賓侶引滿更獻酬未知從今去當復如此不中觴縱遙
情忘彼千載憂且極今朝樂明日非所求

荅龐參軍

三復來貺欲罷不能自爾隣曲冬春再交款然良對

忽成舊游俗諺云數面成親舊况情過此者乎人
事好非便當語離楊公所歎豈惟常悲吾抱疾多
年不復為文本既不豐復老病繼之輒依周孔往
往之義且為別後相思之資

相知何必舊傾蓋定前言有客賞我趣每每顧林園談
諧無俗調所說聖人篇或有數斗酒閒飲自歡然我實
幽居士無復東西緣物新人惟舊弱毫多所宣情通萬
里外形迹滯江山君其愛體素來會在何年

欽定四庫全書

卷四

五月旦作和戴主簿

虛舟縱逸棹回復遂無窮發歲始俛仰星紀奄將中南
窗罕悴物北林榮且豐神淵寫時雨晨色秦景風既來
孰不去人理固有終居常待其盡曲肱豈傷冲遷化或
夷險肆志無衆隆即事如已高何必升華嵩

和劉柴桑

山澤久見招胡事乃躊躇直為親舊故未忍言索居良
辰入奇懷挈杖還西廬荒塗無歸人時時見廢墟茅茨

已就治新疇復應畚谷風轉淒薄春醪解飢飢弱女雖
非男慰情良勝無栖栖世中事歲月共相疎耕織稱其
用過此奚所須去去百年外身名同翳如

酬劉柴桑

窮居寡人用時忘四運周櫚庭多落葉慨然知已秋新
葵鬱北牖嘉穠養南疇今我不為樂知有來歲不命室
携童弱良日登遠游

和郭主簿

藹藹堂前林中夏貯清陰凱風因時來迴飈開我襟息
交游閒業卧起弄書琴園蔬有餘滋舊穀猶儲今營已
良有極過足非所欽春秫作美酒酒熟吾自斟弱子戲
我側學語未成音此事真復樂聊用忘華簪遥遥望白
雲懷古一何深

贈羊長史

左軍羊長史銜使秦川作此與之

愚生三季後慨然念黃虞得知千載外正賴古人書賢

聖留餘跡事事在中都豈忘游心目闕河不可踰九域
甫已一逝將理舟輿聞君當先邁負病不獲俱路若經
商山為我少躊躇多謝綺與角精爽今何如紫芝誰復
採深谷久應蕪駟馬無貫患貧賤有交娛清謠結心曲
人乖運見疎擁懷累代下言盡意不舒

癸卯十二月中作與從弟敬遠

寢跡衡門下邈與世相絕顧盼莫誰知荆扉晝常閉淒
淒歲暮風翳翳經日雪傾耳無希聲在目皓已潔勁氣

侵襟袖簾瓢謝屢設蕭索空宇中了無一可悅歷覽千
載書時時見遺烈高操非所攀深得固窮節平津苟不
由栖遲詎為拙寄意一言外茲契誰能別

與殷晉安別

殷先作晉安南府長史掾因居潯陽後作太尉叅
軍移家東下作此以贈

遊好非久長一遇盡殷勤信宿酬清話益復知為親去
歲家南里薄作少時隣負杖肆游從淹留忘宵晨語默

自殊勢亦知當乖分未謂事已及興言在茲春飄飄西
來風悠悠東去雲山川千里外言笑難為因才華不隱
世江湖多賤貧脫有經過便念來存故人

於王撫軍座送客

秋日淒且厲百卉具已腓爰以履霜節登高餞將歸寒
風冒山澤游雲候無依洲渚思綿邈風水互乖違瞻夕
欲良讌離言聿云悲晨鳥暮來還懸車歛餘暉逝止判
殊路旋駕悵遲遲目送回舟遠情隨萬化遺

始作鎮軍參軍經曲阿作

弱齡寄事外委懷在琴書被褐欣自得屢空常晏如時
來苟冥會宛轡憩通衢投策命晨裝暫與園田踈眇眇
孤舟逝綿綿歸思紆我行豈不遙登降千里餘目倦川
途異心企山澤居望雲慙高鳥臨水愧游魚真想初在
襟誰謂形迹拘聊且憑化遷終返班生廬

辛丑歲七月赴假還江陵夜行塗口作

閒居三十載遂與塵事冥詩書敦宿好林園無俗情如

何捨此去遙遙至南荆叩柰新秋月臨流別友生涼風
起將夕夜景湛虛明昭昭天宇濶晶晶川上平懷役不
遑寐中宵尚孤征商歌非吾事依依在耦耕投冠旋舊
墟不為好爵縈養真衡茅下庶以善自名

乙巳歲三月為建威叅軍使都經錢溪

我不踐斯境歲月好已積晨夕看山川事事悉如昔微
雨洗高林清飈矯雲翮眷彼品物存義風都未隔伊余
何為者勉勵從茲役一形似有制素襟不可易園田日

夢想安得久離析終懷在歸舟諒哉宜霜栢

詠二疎

大象轉四時功成者自去借問衰周來幾人得其趣游
目漢廷中二疎復此舉高躡返舊居長揖儲君傳餞送
傾皇朝華軒盈道路離別情所悲餘榮何足顧事勝感
行人賢哉豈常譽厭厭閭里歡所營非近務促席延故
老揮觴道平素問金終寄心清言曉未悟放意樂餘年
遑恤身後慮誰云其人亡久而道彌著

桃花源詩

晉太元中武陵人捕魚為業緣溪行忘路之遠近忽
逢桃花林夾岸數百步中無雜樹芳草鮮美落英繽紛
漁人甚異之復前行欲窮其林林盡水源便得一
山山有小口髣髴若有光便捨船從口入初極狹纔
通人復行數十步豁然開朗土地平曠屋舍儼然有
良田美池桑竹之屬阡陌交通雞犬相聞其中往來
種作男女衣著悉如外人黃髮垂髻並怡然自樂見

漁人乃大驚問所從來具荅之便要還家設酒殺雞作食村中聞有此人咸來問訊自云先世避秦時亂率妻子邑人來此絕境不復出焉遂與外人間隔問今是何世乃不知有漢無論魏晉此人一一為具言所聞皆歎悅餘人各復延至其家皆出酒食停數日辭去此中人語云不足為外人道也既出得其船便扶向路處處誌之及郡下詣太守說如此太守即遣人隨其往尋向所誌遂迷不復得路南陽劉子驥高

尚士也聞之欣然親往未果尋病終後遂無問津者
嬴氏亂天紀賢者避其世黃綺之商山伊人亦云逝往
迹浸復湮來逕遂蕪廢相命肆農耕日入從所憩桑竹
垂餘蔭菽稷隨時藝春蠶收長絲秋熟靡王稅荒路曖
交通雞犬互鳴吠俎豆猶古法衣裳無新製童孺縱行
歌斑白歡游詣草榮識節和木衰知風厲雖無紀歷誌
四時自成歲怡然有餘樂于何勞智慧竒蹤隱五百一
朝敞神界淳薄既異源旋復還幽蔽借問游方士馬測

塵囂外願言躡輕風高舉尋吾契

九日閒居

余閒居愛重九之名秋菊盈園而持醪靡由空服
九華寄懷于言

世短意常多斯人樂久生日月依辰至舉俗愛其名露
淒暄風息氣徹天象明往燕無遺影來雁有餘聲酒能
祛百慮菊為制顏齡如何蓬廬士空視世運傾塵爵恥
虛罍寒華徒自榮歛襟獨閒謠緬焉起深情棲遲固多

娛淹留豈無成

歸田園居五首

少無適俗韻性本愛丘山誤落塵網中一去三十年羈
鳥戀舊林池魚思故淵開荒南野際守拙歸園田方宅
十餘畝草屋八九間榆柳蔭後園桃李羅堂前曖曖遠
人村依依墟里煙狗吠深巷中雞鳴桑樹顛戶庭無塵
雜虛室有餘閒久在樊籠裏復得返自然

野外罕人事窮巷寡輪鞅白日掩荆扉虛室絕塵想時

欽定四庫全書

石倉歷代詩選
卷四

復墟曲中披草共來往相見無雜言但道桑麻長桑麻
日已長我土日已廣常恐霜霰至零落同草莽

種豆南山下草盛豆苗稀晨興理荒穢帶月荷鋤歸道
狹草木長夕露沾我衣衣沾不足惜但使願無違

久去山澤遊浪莽林野娛試携子姪輩披榛步荒墟徘徊
丘壑間依依昔人居井竈有遺處桑竹殘朽株借問
採薪者此人皆焉如薪者向我言死沒無復餘一世異
朝市此語真不虛人生似幻化終當歸空無

悵恨獨策還崎嶇歷榛曲山澗清且淺遇以濯吾足漉
我新熟酒隻雞招近局日入室中闇荆薪代明燭歡來
苦夕短已復至天旭

諸人共游周家墓栢下

今日天氣佳清吹與鳴彈感彼栢下人安得不為歡清
歌散新聲綠酒開芳顏未知明日事余襟良已殫

移居二首

昔欲居南村非為卜其宅聞多素心人樂與數晨夕懷

此頗有年今日從茲役蔽廬何必廣取足蔽牀席隣曲
時時來抗言談在昔奇文共欣賞疑義相與析

春秋多佳日登高賦新詩過門更相呼有酒斟酌之農
務各自歸閒暇輒相思相思則披衣言笑無厭時此理
將不勝無為忽去茲衣食當須紀力耕不吾欺

癸卯歲始春懷古田舍二首

在昔聞南畝當年竟未踐屢空既有人春興豈自免夙
裝晨吾駕啓塗情已緬烏弄歡新節冷風送餘善寒竹

被荒蹊地為罕人遠是以植杖翁悠然不復返即理愧
通識所保詎乃淺

先師有遺訓憂道不憂貧瞻望邈難逮轉欲志常勤秉
耒歡時務解顏勸農人平疇交遠風良苗亦懷新雖未
量歲功即事多所欣耕種有時息行者無問津日入相
與歸壺漿勞近隣長吟掩柴門聊為隴畝民

巳酉歲九月九日

靡靡秋已夕淒淒風露交蔓草不復榮園木空自凋清

風澄餘滓杳然天界高哀蟬無歸響叢雁鳴雲霄萬化
相尋繹人生豈不勞從古皆有沒念之中心焦何以稱
我情濁酒且自陶千載非所須聊以永今朝

庚戌歲九月中於西田穫早稻

人生歸有道衣食固其端孰是都不營而以求自安開
春理常業歲功聊可觀晨出肆微勤日入負耒還山中
饒霜露風氣亦先寒田家豈不苦弗獲辭此難四體誠
乃疲庶無異患干盥濯息簷下斗酒散襟顏遙遙沮溺

心千載乃相關但願長如此躬耕非所歎

飲酒

余閒居寡歡兼此夜已長偶有名酒無夕不飲顧
影獨盡忽焉復醉既醉之後輒題數句自娛紙墨
遂多辭無詮次聊命故人書之以為歡笑爾

衰榮無定在彼此更共之邵生瓜田中寧似東陵時寒
暑有代謝人道每如茲達人解其會逝將不復疑忽與
一觴酒日夕歡相持

積善云有報夷叔在西山善惡苟不應何事立空言九
十行帶索飢寒况當年不賴固窮節百世當誰傳

道喪向千載人人惜其情有酒不肯飲但顧世間名所以
貴我身豈不在一生一生能復幾倏如流電驚鼎鼎百
年內持此欲何成

栖栖失羣鳥日暮猶獨飛徘徊無定止夜夜聲轉悲厲
響思清遠去來何依依自植孤生松斂翮遙來歸勁風
無榮木此蔭獨不衰托身已得所千載不相違

結廬在人境而無車馬喧問君何能爾心遠地自偏採
菊東籬下悠然見南山山氣日夕佳飛鳥相與還此中
有真意欲辨已忘言

秋菊有佳色裛露掇其英汎此忘憂物遠我遺世情一
觴雖獨進杯盡壺自傾日入羣動息歸鳥趨林鳴嘯傲
東軒下聊復得此生

青松在東園衆草沒竒姿凝霜殄異類卓然見高枝連
林人不覺獨樹衆乃竒提壺掛寒柯遠望時復為吾生

幻夢間何事絀塵羈

清晨聞叩門倒裳往自開問子為誰歟田父有好懷壺
漿遠見候疑我與時乖繼縷茅簷下未足為高棲一世
皆尚同願君汨其泥深感父老言稟氣寡所諧紆轡誠
可學違已詎非迷且共歡此飲吾駕不可回

有客常同止趣舍邈異境一士長獨醉一夫終年醒醒
醉還相笑發言各不領規規一何愚兀傲差若穎寄言
酣中客日沒燭當炳

子雲性嗜酒家貧無由得時賴好事人載醪祛所惑觴
來為之盡是詔無不塞有時不肯言豈不在伐國仁者
用其心何嘗失顯默

義皇去我久舉世少復真汲汲魯中叟彌縫使其淳鳳
鳥雖不至禮樂暫得新洙泗輟微響漂流逮狂秦詩書
復何罪一朝成灰塵區區諸老翁為事誠殷勤如何絕
世下六籍無一親終日馳車走不見所問津若復不快
飲空負頭上巾但恨多謬誤君當恕醉人

擬古

仲春遘時雨始雷發東隅衆蟄各潛駭草木縱橫舒翩
翩新來燕雙雙入我廬先巢固尚在相將還舊居自從
分別來門庭日荒蕪我心固匪石君情定何如

迢迢百尺樓分明望四荒暮作歸雲宅朝為飛鳥堂山
河滿目中平原獨茫茫古時功名士慷慨爭此場一旦
百歲後相與還北邙松柏為人伐高墳互低昂顏基無
遺主遊魂在何方榮華誠足貴亦復可憐傷

東方有一士被服常不完三旬九遇食十年着一冠辛
苦無此比常有好看顏我欲觀其人晨去越河關青松
夾路生白雲宿簷端知我故來意取琴為我彈上絃驚
別鶴下絃操孤鸞願留就君住從今至歲寒

日暮天無雲春風扇微和佳人美清夜達曙酣且歌歌
竟長歎息持此感人多皎皎雲間月灼灼葉中華豈無
一時好不久當如何

少時壯且厲撫劒獨行遊誰言行遊近張掖至幽州飢

食首陽薇渴飲易水流不見相知人惟見古時丘路邊
兩高墳伯牙與莊周此士難再得吾行欲何求

雜詩

白日淪西河素月出東嶺遙遙萬里輝蕩蕩空中景風
來入房戶夜中枕席冷氣變悟時易不眠知夕永欲言
無余和揮杯勸孤影日月擲人去有志不復騁念此懷
悲淒終曉不能靜

憶我少壯時無樂自歡豫猛志逸四海騫翮思遠翥在

萬歲月顏此心稍已去值歡無復娛每每多憂慮氣力
漸衰損轉覺日不如壑舟無須更引我不得住前途當
幾許未知止泊處古人惜寸陰念此使人懼

昔聞長者言掩耳每不喜奈何五十年忽已親此事求
我盛年歡一毫無復意去去轉欲遠此生豈再值傾家
時作樂竟此歲月駛有子不留金何用身後置

我行未云遠回顧慘風涼春燕應節起高飛拂塵梁邊
雁悲無所代謝歸北鄉離鵑鳴清池暑月經秋霜愁人

難為辭遙遙春夜長

詠貧士

萬族各有託孤雲獨無依
曖曖空中滅何時見餘暉
朝霞開宿霧衆鳥相與飛
遲遲出林翮未夕復來歸
量力守故轍豈不寒與飢
知音苟不存已矣何所悲

淒厲歲云暮擁褐曝前軒
南圃無遺秀枯條盈北園
傾壺絕餘瀝闕竈不見煙
詩書塞座外日昃不遑研
閒居非陳厄竊有愠見言
何以慰吾懷賴古多此賢

袁安困積雪邈然不可干阮公見錢入即日棄其官芻
藁有常溫採芣足朝餐豈不實辛苦所懼非飢寒貧富
當交戰道勝無戚顏至德冠邦閭清節映西關

仲蔚愛窮居遶宅生蒿蓬翳然絕交游賦詩頗能工舉
世無知者止有一劉龔此士胡獨然實由罕所同介馬
安其業所樂非窮通人事固以拙聊得長相從

讀山海經

孟夏草木長遶屋樹扶疎衆鳥欣有託吾亦愛吾廬既

耕亦已種時還讀我書窮巷隔深轍頗迴故人車歡言
酌春酒摘我園中蔬微雨從東來好風與之俱汎覽周
王傳流觀山海圖俯仰終宇宙不樂復何如

悲從弟仲德

銜哀過舊宅悲淚應心零借問為誰悲懷人在九冥禮
服名羣從恩愛若同生門前執手時何意爾先傾在數
竟未免為山不及成慈母沈哀疚二眉纔數齡雙位委
空館朝夕無哭聲流塵集虛座宿草旅前庭階除曠游

跡園林獨餘情翳然乘化去終天不復形遲遲將迴步
惻惻悲襟盈

擬挽歌辭三首

有生必有死早終非命促昨暮同為人今旦在鬼錄魂
氣散何之枯形寄空木嬌兒索父啼良友撫我哭得失
不復知是非安能覺千秋萬歲後誰知榮與辱但恨在
世時飲酒不得足

在世無酒飲今但湛空觴春醪生浮蟻何時更能嘗肴

案盈我前親舊哭我傍欲語口無音欲視眼無光昔在高堂寢今宿荒草鄉一朝出門去歸來夜未央

荒草何茫茫白楊亦蕭蕭嚴霜九月中送我出遠郊四面無人居高墳正焦薨馬為仰天鳴風為自蕭條幽室一已閉千年不復朝千年不復朝賢達將奈何向來相送人各自還其家親戚或餘悲他人亦已歌死去何所道託體同山阿

殷仲文

南州相公九井作

四運雖鱗次理化各有準獨有清秋日能使高興盡景
氣多明遠風物自淒緊爽籟驚幽律哀壑叩虛牝歲寒
無早秀浮榮甘夙隕何以標貞脆薄言寄松菌括匠感
蕭晨肅此塵外軫廣筵散泛愛逸爵紆勝引伊余樂好
仁惑祛吝亦泯猥首阿衡朝將貽匈奴哂

謝混

遊西池

悟彼蟋蟀唱信此勞者歌有來豈不疾良遊常蹉跎逍
遙越城肆願言屢經過迴阡被陵闕高臺眺飛霞惠風
蕩繁囿白雲屯曾阿景昃鳴禽集水木湛清華褰裳順
蘭沚徙倚引芳柯美人愆歲月遲暮獨如何無為牽所
思南榮戒其多

湛方生

廬山神仙詩

序曰尋陽有廬山者盤其彭蠡之西其崇標峻極

辰光隔輝幽澗澄深積清百仞若乃絕阻重險非
人迹之所遊窈窕冲深常含霞而貯氣真可謂神
明之區域列真之苑囿矣太元十一年有樵採其
陽者于時鮮霞褰林傾暉映岫見一沙門披法服
獨在巖中俄頃振裳揮錫凌巖直上排丹霄而輕
舉起九折而一指既白雲之可乘何帝鄉之足
遠哉窮目蒼蒼翳然滅跡詩曰

吸風玄圃飲露丹霄室宅五岳賓友松喬解纓復褐辭

朝歸藪門不容軒宅不盈畝茂草籠庭滋蘭拂牖開櫺
攸瞻坐對川阜心焉孰託託非空有素構易抱玄根難
朽即之匪遠可以長久

帆入南湖

彭蠡紀三江廬岳王衆阜白沙淨川路青松蔚巖首此
水何時流此山何時有人運互推遷茲器獨長久悠悠
宇宙中古今迭先後

天晴詩

屏翳寢神轡飛廉收靈扇青天瑩如鏡凝津平如研落
帆修江渚悠悠極長眇清氣朗山壑千里遙相見

遊園詠

諒茲境之可懷究川阜之奇勢水窮清以徹鑒山隣天
而無際乘初霽之新景登北館以悠矚對荆門之孤阜
傍魚陽之秀岳乘夕陽而含詠杖輕策以行遊襲秋蘭
之流芬慕長椅之森修任緩步以升降歷丘墟而四周
智無涯而難恬性有方而易適差一毫而遽乖徒理存

而事隔故羈馬思其華林籠雉想其臯澤矧流客之歸
思豈可忘于疇昔

蘇彥

七月七日詠織女

火流涼風至少昊協素藏織女思北沚牽牛歎南陽時
來嘉慶集整駕巾玉箱瓊珮垂藻蕤霧裾結雲裳金翠
耀華輜輶輶散流芳釋轡紃微庭解衿碧琳堂歡讌未
及究晨暉照扶桑仙童唱清道盤螭起騰驤悵悵一宵

促遲遲別日長

陸沖

雜詩二首

命駕遵長途綿邈途難尋我行亦何艱山川阻且深
洿澤無夷軌重巒有層陰零雨淹中路玄雲蔽高岑
俯悼孤行獸仰歎偏翔禽空谷回倒影流風漂哀音
羈旅淹留久悵望愁我心

肆觀野原外放心希太和景嶽造天漢豐林冒重阿清

芬乘風散豔藻映淥波

張駿

東門行

勾芒御春正衡紀運玉瓊明庶起祥風和氣翕來征慶
雲蔭八極甘雨潤四垓昊天降靈澤朝日耀華精嘉苗
布原野百卉敷時榮鳩鵲與鷺黃間關相和鳴葦萍覆
靈沼香花揚芳馨春遊誠可樂感此白日傾休否有終
極落葉思本莖臨川悲逝者節變動中情

文遁

四月八日讚佛詩

三春迭云謝首夏含朱明祥祥令日泰朗朗玄夕清菩
薩彩靈和眇然因化生四王應期來矯掌承玉形飛天
鼓弱羅騰權散芝英綠瀾顏龍首縹藥翳流冷芙蕖育
神葩傾柯獻朝榮芬津霈四境甘露凝玉瓶珍祥盈四
八玄黃曜紫庭感降非情想恬怕無所營玄根泯靈府
神條秀形名圓光朗東旦金姿艷春精含和總八音吐

納流芳馨跡隨因溜浪心與太虛冥六度啓窮俗八解
濯世纓慧澤融無外空同忘化情

五月長齋詩

炎精育仲氣朱離吐凝陽廣漢潛涼變凱風乘和翔令
月肇清齋德澤潤無疆四部欽嘉期潔已升雲堂靜宴
和春暉夕陽厲秋霜蕭條詠林澤恬愉味城傍逸容研
冲蹟綵綵運宮商匠者握神標乘風吹玄芳淵汪道行
深婉婉化理長疊疊維摩虛德音暢遊方罩牢妙傾玄

絕致由近藏略略微容簡八言振道綱掇煩練陳句臨
危折婉章浩若驚飈散回若揮夜光寓言豈所託意得
筌自喪霑濡妙習融靡靡輕塵亡蕭索情牖頽寥朗神
軒張誰謂冥津遐一悟可以航願為海遊師權施入滄
浪騰波濟漂客玄歸會道場

八關齋詩三首

間與何驃騎期當為合八關齋以十月二十二日集
同意者在吳縣土山墓下三日清晨為齋始道士白

衣凡二十四人清和肅穆莫不靜暢至四日朝衆賢
各去余既樂野室之寂又有拯藥之懷遂便獨住于
是乃揮手送歸有望路之想靜拱虛房悟外身之真
登山採藥集巖水之娛遂援筆染翰以慰二三之情

建意營法齋里仁契朋儔相與期良晨沐浴造閒丘穆
穆升堂賢皎皎清心修窈窕八闕客無捷自綢繆寂默
五習真疊疊勵心柔法鼓進三勸激切清訓流悽愴弘
願濟闔堂皆同舟明明立表聖應此童蒙求存誠夾室

裏三界讚清休嘉祥歸宰相藹若慶雲浮

三晦啟前朝雙臘暨中夕鳴禽戒朗旦備禮寢玄役蕭
索庭賓離飄飄隨風適踟躕歧路隅揮手謝內析輕軒
馳中田習習陵電擊息心投佯步零零振金策引領望
征人悵恨孤思積咄矣形非我外物固已寂吟咏歸虛
房守真玩幽蹟雖非一往遊且以閒自釋

靖一潛蓬廬惜惜詠初九廣莫排林篠流飈灑隙牖從
容遐想逸採藥登崇阜崎嶇升千尋蕭條臨萬畝望山

樂榮松瞻澤哀素柳解帶長陵坡婆娑清川右冷風解
煩懷寒泉濯溫手寥寥神氣暢欽若盤春藪達度冥三
才恍惚喪神偶遊觀同隱丘愧無連化肘

詠懷詩五首

傲兀乘尸素日往復月旋弱喪困風波流蕩逐物遷中
路高韻益窈窕欽重玄重玄在何許採真遊理間苟簡
為我養逍遙使我閒寥亮心神瑩含虛映自然塵塵沈
情去彩彩沖懷鮮踟躕觀象物未始見牛全毛鱗有所

貴所貴在忘筌

端坐隣孤影渺罔玄思幼偃蹇收神轡領畧綜名書涉
老哈雙玄披莊玩太初詠發清風集觸思皆恬愉俯欣
質文蔚仰悲二匠徂蕭蕭柱下迴寂寂蒙邑虛廓矣千
載事消液歸空無無矣復何傷萬殊歸一途道會貴冥
想罔象掇玄珠悵怏濁水際幾忘映清渠反鑒歸澄漠
容與含道符心與理理密形與物物疎蕭索人事去獨
與神明居

晞陽熙春圃悠緬歎時往感物思所託蕭條逸韻上尚
想天台峻髮髯巖階仰冷風灑蘭林管瀨奏清響霄崖
育靈藹神蔬含潤長丹砂暎翠瀨芳芝曜五爽苔苔重
岫深寥寥石室朗中有尋化士外身解世網抱朴鎮有
心揮玄拂無想隗隗形崖頽同同神宇敞宛轉元造化
縹緲隣大象願投若人蹤高步振策杖

閑邪託靜室寂寥虛且真逸想流巖阿朦朧望幽人慨
矣玄風濟皎皎離染純時無問道者行歌將何因靈溪

眇驚浪四岳赫埃塵余將遊其岵解駕輟飛輪芳泉代
甘醴山果兼時珍修林暢輕跡石宇庇微身崇虛習本
照損無歸昔神曖曖煩情故零零沖氣新近非域中客
遠非世外臣憺怕無為德孤哉自有隣

坤基葩簡秀乾光流易穎神理速不疾道會無陵騁超
超介石人握玄攬機領余生一何散分不詔天挺沈無
冥到韻變不揚蔚炳冉冉年往逡悠悠化期永翹首希
玄津想登故未正生途雖十三日已造死境願得無身

道高栖沖默靖

述懷詩二首

翔鸞鳴崑崙逸志騰冥虛惚恍迴靈翰
息肩棲南嶠濯足戲流瀾採練銜神
蔬高吟漱芳醴頤頽登神梧蕭蕭倚
明翮眇眇育清軀長想玄運夷傾首俟
靈符河清誠可期戢翼令人劬

總角敦大道弱冠弄雙玄逡巡釋長羅
高步尋帝先妙損階玄老忘懷浪濠川
達觀無不可吹累皆自然窮理

增靈薪昭昭神火傳熙怡安冲漠優游樂靜閒膏腴無
爽味婉變非雅絃恢心委形度疊疊隨化遷

詠利城山居

五嶽盤神基四瀆涌查津動求目方智默守標靜仁苟
不宴出處託好有常因尋元存終古洞往想逸民玉潔
箕巖下金聲瀨沂濱捲華藏紛霧振褐拂埃塵跡從尺
蠖屈道與騰龍伸峻無單豹伐分非首陽真長嘯歸林
嶺瀟灑任陶鈞

惠遠

廬山東林雜詩

崇巖吐清氣幽岫棲神跡希聲奏羣籟響出山溜滴有
客獨冥遊徑然忘所適揮手撫雲門靈關安足闢流心
叩玄扃感至理弗隔孰是騰九霄不奮沖天翮妙同趣
自均一悟超三益

報羅什偈一首

本端竟何從起滅有無際一微涉動境成此頽山勢惑

相更相乘觸理自生滯因緣雖無主開途非一世時無
悟宗匠誰謂握玄契末問尚悠悠相與期暮歲

廬山諸道人

遊石門詩

石門在精舍南十餘里一名障山基連大嶺體絕衆
阜闢三泉之會並立而開流傾巖玄映其上蒙形表
于自然故因以為名此雖廬山之一隅實斯地之奇
觀皆傳之于舊俗而未覩者衆將由懸瀨險峻人獸

迹絕逕迴曲阜路阻行難故罕經焉釋法師以隆安四年仲春之月因詠山水遂振錫而遊于時交徒同趣三十餘人咸拂衣晨征悵然增興雖林壑幽邃而開塗競進雖乘危履石並以所悅為安既至則援木尋葛歷險窮崖猿臂相引僅乃造極于是擁勝倚巖詳觀其下始知七嶺之美蘊奇于此雙闕對峙其前重巖映帶其後巒阜周迴以為障崇巖四營而開宇其中則有石臺石池宮館之象觸類之形致可樂也

清泉分流而合注淥淵鏡淨于天池文石發彩煥若
披面檉松芳草蔚然光目其為神麗亦已備矣斯日
也衆情奔悅矚覽無厭遊觀未久而天氣屢變巖霧
塵集則萬象隱形流光迴照則衆山倒影開闔之際
狀有靈焉而不可測也乃其將登則翔禽拂翮鳴猿
厲響歸雲迴駕想羽人之來儀哀聲相和若玄音之
有寄雖髣髴猶聞而神以之暢雖樂不期歡而欣以
永日當其冲豫自得信有味焉而未易言也退而尋

之夫巖谷之間會物無主應不以情而開興引人致
深若此豈不以虛明朗其照閒邃篤其情耶並三復
斯談猶昧然未盡俄而太陽告夕所存已往乃悟幽
人之玄覽達恒物之大情其為神趣豈山水而已哉
于是徘徊崇嶺流目四矚九江如帶丘阜成垤因此
而推形有巨細智亦宜然迺喟然歎宇宙雖遐古今
一契靈鷲邈矣荒途日隔不有哲人風跡誰存應深
悟遠慨焉長懷各欣一遇之同歡感良辰之難再情

發于中遂共詠之云爾

超興非有本理感興自生忽聞石門遊竒唱發幽情褰
裳思雲駕望崖想曾城馳步乘長巖不覺質有輕矯首
登靈闕眇若凌太清端坐運虛論轉彼玄中經神仙同
物化未若兩俱冥

帛道猷

陵峯採藥觸興為詩

連峯數千里修林帶平津雲過遠山翳風至梗荒榛茅

茨隱不見雞鳴知有人閒步踐其徑處處見遺薪始知
百代下故有上皇民

謝道韞

登山

峩峩東嶽高秀極冲青天巖中間虛宇寂寞幽以玄非
工復非匠雲構發自然氣象爾何物遂令我屢遷逝將
宅斯宇可以盡天年

擬嵇中散詠松

遙望山上松隆冬不能凋願想遊下憇瞻彼萬仞條騰躍未能升頓足俟王喬時哉不我與大運寧飄颻

桃葉

荅團扇歌三首

七寶畫團扇祭爛明月光與郎却暄暑相憶莫相忘
青青林中竹可作白團扇動搖郎玉手因風託方便
團扇復團扇持許自障面憔悴無復理羞與郎相見

獨漉篇

獨漉獨漉水深泥濁泥濁尚可水深殺我雍雍雙雁遊
戲田畔我欲射雁念子孤散翩翩浮萍得風搖輕我心
何合與之同并空牀低惟誰知無人夜衣錦繡誰別偽
真刀鳴箭中倚牀無施父冤不報欲活何為猛猛斑斑
遊戲山間虎欲齧人不避豪賢

晉白紵舞歌詩

輕軀徐起何洋洋高舉兩手白鵠翔宛若龍轉乍低昂
凝停善睐容儀光如推若引留且行隨世而變誠無方

舞以盡神安可忘晉世方昌樂未央質如輕雲色如銀
愛之遺誰贈佳人制以為袍餘作巾袍以光軀中拂塵
麗服在御會佳賓醪醴盈樽美且淳清歌徐舞降祇神
四座歡樂胡可陳

雙袂齊舉鸞鳳翔羅袞飄飄昭儀光趨步生姿進流芳
鳴絃清歌及三陽人生世間如電過樂時每少苦日多
幸及良辰耀春華齊倡獻舞趙女歌義和馳景逝不停
春露未晞嚴霜零百草凋索花落英蟋蟀吟牖寒蟬鳴

百年之命忽若傾早知迅速秉燭行東造扶桑遊紫庭
西至崑崙戲曾城

吳聲歌曲

子夜歌

始欲識郎時兩心望如一理絲入殘機何悟不成匹
前絲斷纏綿意欲結交情春蠶易感化絲子已復生
郎為傍人取負儂非一事攤門不安橫無復相關意
我念歡的的子行由豫情霧露隱芙蓉見蓮不分明

昔別雁集渚今還燕巢梁敢辭歲月久但使逢春陽

雜曲歌辭

西洲曲

憶梅下西洲折梅寄江北單衫杏子紅雙鬢鴉雛色西
洲在何處兩漿橋頭渡日暮伯勞飛風吹烏臼樹樹下
即門前門中露翠鈿開門郎不至出門採紅蓮採蓮南
塘秋蓮花過人頭低頭弄蓮子蓮子青如水置蓮懷袖
中蓮心徹底紅憶郎郎不至仰首望飛鴻鴻飛滿西洲

望郎上青樓樓高望不見盡日欄干頭欄干十二曲垂
手明如玉卷簾天自高海水搖空綠海水夢悠悠君愁
我亦愁南風知我意吹夢到西洲

東飛伯勞歌

東飛伯勞西飛燕黃姑織女時相見誰家兒女對門居
闔顏發豔照里閭南窗北牖桂月光羅帷綺帳脂粉香
女兒年幾十五六窈窕無雙顏如玉三春已暮花從風
空留可憐誰與同

樂辭

繡幙圍風香耳節朱絲桐不知理何事淺立經營中愛
惜加窮袴妨閑託守宮今日牛羊上丘隴當年近前面
發紅

休洗紅二首

休洗紅洗多紅色淡不惜故縫衣記得初按苗人壽百
年能幾何後來新婦今為婆

休洗紅洗多紅在水新紅裁作衣舊紅番作裏迴黃轉

綠無定期世事返復君所知


襄陽兒童歌

山公出何許往至高陽池日夕倒載歸醕酤無所知時
時能騎馬倒着白接羅舉鞭向葛疆何如并州兒

武陵人歌

黃閣武陵記曰有綠蘿山側巖垂水懸蘿百里許
得明月池碧潭鏡澈百尺見底素巖若雪松如挿
翠流風叩柯有絲桐之韻土人為之歌曰

仰茲山兮迢迢層石構兮嵯峨朝日麗兮陽巖落景梁
兮陰阿鄣壑兮生音吟籟兮相和敷芳兮綠林恬淡兮
潤波樂茲潭兮安流緩爾權兮詠歌



石倉歷代詩選卷四

欽定四庫全書

集部

石倉歷代詩選卷五

詳校官庶吉士_臣范逢恩

侍讀_臣孫球覆勘

總校官進士_臣朱鈐

校對官中書_臣嵇承志

謄錄監生_臣高鏡

欽定四庫全書

石倉歷代詩選卷五

明 曹學佺 編

宋詩

文帝

登景陽樓

崇堂臨萬雉層樓跨九成
瑤軒籠翠幌組幙翳雲屏
階上曉露潔林下夕風清
蔓藻嬛綠葉芳蘭媚紫莖
極望

周天險留察決神京交渠紛綺錯列植發華英

北伐

季文鑒禍先辛生識機始崇眷非無徵興廢要有以自
昔淪中畿候馬盈百祀不覩南雲陰但見胡塵起亂極
治方形塗泰由積否方欲除遺氛矧乃穢邊鄙眷言悼
斯民納隍良在已逝將振弘綱一麾同文軌

孝武帝

丁督護歌

聞歡去北征相送直瀆浦只有淚可出無復情可吐
督護初征時儂亦惡聞許願作石尤風四面斷行旅

自君之出矣

自君之出矣金翠闇無精思君如日月回還晝夜生

遊覆舟山

束髮好怡行弱冠頗流薄素想終勿傾聿來果丘壑層
峯亘天維曠渚綿地絡逢臯列神苑遭壇樹仙閣松塏
含青暉荷源煜彤爍川界泳遊鱗巖庭響鳴鶴

登作樂山

修路軫孤轡竦石頓飛轅遂登千尋首表裏望丘原屯
煙擾風穴積水溺雲根漢潦吐新波楚山帶舊苑壤草
凌故國拱木秀顏垣目極情無留客思空已繁

登魯山

解帆憩通渚息徒憑椒丘粵值風景和升高從遠眸紀
郢窮西路湘夢極南流香哉漢陰水浩焉江界修

濟曲阿後湖

宵登毘陵路旦過雲陽郭平湖曠津濟菰渚迭明蕪和
風翼歸采夕氛晦山岵驚濶翻魚藻潁霞照桑榆

與廬陵王紹別

連歲矜離心今茲幸良集信宿窮晨暮開顏披所載未
盡歡娛懷已傷岐路及舳艫引江介飛旌背京邑悄擾
徒旅戒團欒流景入遲遲分手念泣泣登路泣

拜衡陽文王義季墓

昧旦憑行軾濡露及山庭投步矜履蹈舉目增淒清軫

路滅歸軫淪闔負重局深松朝已霧幽隧宴未明長楊
數晚素宿草披初青哀往起沈泉追愛慟中情竹帛憑
年遠世範隨代傾

七夕

白日傾晚照弦月升初光炫炫葉露滿肅肅庭風揚瞻
言媚天漢幽期濟河梁服箱從奔軫綺闕成章解帶
遽迴軫誰云秋夜長愛聚雙情欸念離兩心傷

初秋

夏盡炎氣微
火息涼風生
綠草未傾色
白露已盈庭
遠視秋雲發
近聽寒蟬鳴
運移矜物化
川上感餘情

秋夜

局景薄西隅
升月照東垂
肅肅風盈幕
泫泫露傾枝
側聞飛壺急
坐見河宿移
覩辰念節變
感物矜乖離

江夏王義恭

豔歌行

江南遊湘妃
窈窕漢濱女
淑問流古今
蘭音媚鄭楚
瑤

顏映長川善服照通辭求思望襄滢嘆息對衡渚中情
未相感搔首增企予悲鴻失良匹俯仰戀儔侶徘徊忘
寢食羽翼不能舉傾首佇春鶯為我津辭語

遊子移

三河遊蕩子麗顏邁荆寶携持玉柱筇懷挾忘憂草綢
繆甘泉中馳逐邯鄲道春服候時製秋紈迎涼造珍魄
暉素腕玉迹滿襟抱常嘆樂日宴恒悲歡不早揮吹傳
舊美趨謠盡新好仲尼為輟餐秦王足傾倒

自君之出矣

自君之出矣，筇錦廢不開。思君如清風，曉夜常徘徊。

登景陽樓

丹墀設金屏，瑤榭陳玉牀。溫宮冬開燠，清殿夏含霜。弱
藥布遐馥，輕葉振遠芳。彌望少無際，肆睇周華疆。象闕
對馳道，飛廉矚方塘。邱寺送暉曜，槐柳自成行。通川溢
輕艫，長街盈方箱。顧此爝火微，胡顏廁天光。

彭城戲馬臺集

騁驚辭南京弭節憩東楚懿蕃重遐望興言集僚侶于
役未云淹時遷變滄暑眷戀江水流迴首獨延佇

南平王鐸

三婦豔詩

大婦裁霧縠中婦牒冰練小婦端清景含歌登玉殿丈
人且徘徊臨風傷流霰

擬行行重行行

耿耿陵長道遙遙行遠之迴車背京里揮手從此辭堂

上流塵生庭中綠草滋寒蟬翔水曲秋兔依山基芳年
有華月佳人無還期日夕涼風起對酒長相思悲發江
南調憂妾子衿詩卧覺明燈晦坐見輕紈縑淚容不可
飾幽鏡難復治願垂薄暮景照妾桑榆時

擬明月何皎皎

落宿半遙城浮雲藹層闕玉宇來清風羅帳延秋月結
思想伊人沈憂懷明發誰為客行久屢見流芳歇

代收淚就長路

聳轡高陵曲揮袂廣川濱黃塵昏白日悲風起浮雲蕭
條萬里別契濶三秋分時往從朝露年來驚夕氲徘徊
去芳節依遲從遠軍

過歷山湛長史草堂

茲嶽蘊虛詭憑覽趣亦贍九峯相接連五渚逆縈浸層
阿疲且引絕巖暢方禁溜衆夏更寒林交晝常蔭伊余
久溜湮復得味恬淡願遂安期止於焉愜高枕

秋歌

昊天清且高秋氣發初涼白露下微津明月流素光凝
煙汎城闕淒風入軒房朱華先零落綠草就芸黃纖羅
還笥篋輕紈改衣裳

何承天

芳樹篇

芳樹生北庭豐隆正徘徊翠穎陵冬秀紅葩迎春開佳
人閒幽室惠心婉以諧蘭房掩綺幌綠草被長階日夕
遊雲際歸禽命同棲皓月盈素景涼風拂中閨哀絃理

虛堂要妙清且淒
嘯歌流激楚傷此碩人懷
梁塵集丹
帷微飈揚羅袿
豈怨嘉時暮徒惜良願乖

顏延之

車駕幸京口侍遊蒜山作

元天高北列日觀臨東溟
入河起陽峽踐華因削成
巖險去漢宇襟衛徙吳京
流池自化造山關固神營
園縣極方望邑社總地靈
宅道炳星緯誕曜應辰明
睿思纏故里巡駕市舊垌
陟峯騰輦路尋雲抗瑤薨
春江壯風

濤蘭野茂萸英宣遊弘下濟窮遠凝聖情嶽濱有和會
祥習在下征周南悲昔老留滯感遺氓空食疲廊肆反
稅事巖耕

夏夜呈從兄散騎車長沙

炎天方埃鬱暑宴閣塵紛獨靜闕偶坐臨堂對星分側
聽風薄木遙睇月開雲夜蟬當夏急陰蟲先秋聞歲候
初過半荃蕙豈久芬屏居惻物變慕類抱情殷九逝非
空思七襄無成文

和謝監靈運

弱植慕端操，窘步懼先迷。寡立非擇方，刻意藉窮棲。伊
昔邁多幸，秉筆侍兩閨。雖慙丹臆施，未謂玄素睽。徒遭
良時，詆王道，奄昏霾。人神幽明絕，朋好雲雨乖。弔屈汀
洲，浦謁帝蒼山。蹊倚巖，聽緒風，攀林結，留萸跂。予問衡
嶠，曷月瞻秦稽。皇聖昭天德，豐澤振沈泥。惜無雀雉化，
何用充海淮。去國還故里，幽門樹蓬藜。采葑葍，昔宇翦
棘，開舊畦。物謝時既宴，年往志不偕。親仁敷情昵，興玩

究辭悽芬馥歇蘭若清越奪琳琅盡言非報章聊用布
所懷

北使洛

改服飭徒旅首路跼險艱振楫發吳洲秣馬陵楚山塗
出梁宋郊道由周鄭間前登陽城路日夕望三川在昔
輟期運經始闢聖賢伊瀝絕津濟臺館無尺椽宮陛多
巢穴城闕生雲煙王猷升八表嗟行方暮年陰風振涼
野飛雲瞶窮天臨塗未及引置酒慘無言隱憫徒御悲

威遲良馬煩遊役去芳時歸來屢徂讐蓬心既已矣飛
薄殊亦然

還至梁城作

眇默軌路長憔悴征戍勤昔邁先徂師今來後歸軍振
策睠東路傾側不及羣息徒顧將夕極望梁陳分故國
多喬木空城凝寒雲丘隴填郭郭銘誌滅無文木石局
幽閨黍苗延高墳惟彼雍門子吁嗟孟嘗君愚賤同埋
滅尊貴誰獨聞曷為久游客憂念坐自殷

始安郡還都與張湘州登巴陵城樓作

江漢分楚望衡巫奠南服三湘淪洞庭七澤藹荆牧經
塗延舊軌登闥訪川陸水國周地險河山信重複却倚
雲夢林前瞻京臺囿清霧霽岳陽曾暉薄瀾澳悽矣自
遠風傷哉千里目萬古陳往還百代勞起伏存沒竟何
氏炯介在明淑請從上世人歸來藝桑竹

秋胡詩九首

椅梧傾高鳳寒谷待鳴律影響豈不懷自遠每相匹婉

彼幽閒女作嬪君子室峻節貫秋霜明艷作朝日嘉運
既我從欣願自此畢

燕居未及好良人顧有違脫巾千里外結綬登王畿戒
徒在昧旦左右來相依驅車出郊郭行路正威遲存為
久離別沒為長不歸

嗟余怨行役三陟窮晨暮嚴駕越風寒解鞍犯霜露原
隰多悲涼迴颺卷高樹離獸起荒蹊驚鳥縱橫去悲哉
遊宦子勞此山川路

超搖行人遠宛轉年運徂良時為此別日月方向除孰
知寒暑積僂俛見榮枯歲暮臨空房涼風起坐隅寢興
日已寒白露生庭蕪

勤役從歸願反路遵山河昔辭秋未素今也歲載華蠶
月歡時暇桑野多經過佳人從所務窈窕援高柯傾城
誰不顧弭節停中阿

年往誠思勞路遠闊音形雖為五載別相與昧平生捨
車遵往路鳬藻馳目成南金豈不重聊自意所輕義心

多苦調密此金玉聲

高節難久淹竭來空復辭遲遲前途盡依依造門基上
堂拜嘉慶入室問何之日暮行采歸物色桑榆時美人
望昏至慙嘆前相持

有懷誰能已聊用申苦難離居殊年載一別阻河關春
來無時豫秋至恒早寒明發動愁心閨中起長嘆慘悽
歲方宴日落遊子顏

高張生絕弦聲急由調起自昔枉光塵結言固終始如

何久為別百行讐諸已君子失明義誰與偕沒齒愧彼
行露詩甘之長川汜

五君詠五首

阮步兵

阮公雖淪跡識密鑒亦洞沈醉似埋照寓辭類託諷長
嘯若懷人越禮自驚衆物故不可論途窮能無慟

嵇中散

中散不偶世本自餐霞人形解驗默仙吐論知凝神立

俗迂流議尋山洽隱淪鸞翮有時鍛龍性誰能馴

劉參軍

劉伶善閉關懷情減聞見鼓鐘不足歡榮色豈能眩韜
精日沈飲誰知非荒宴頌酒雖短章深衷自此見

阮始平

仲容青雲器實稟生民秀達音何用深識微在金奏郭
奕已心醉山公非虛覲屢薦不入官一麾乃出守

向常侍

向秀甘淡薄深心託毫素探道好淵玄觀書鄙章句交
呂既鴻軒攀嵇亦鳳舉流連河裏遊惻悽山陽賦

為織女贈牽牛

婺女儷經星姮娥棲飛月慙無二媛靈託身侍天闕閭
闔殊未暉咸池豈沐髮漢陰不夕張長河為誰越雖有
促讌期方須涼風發虛計雙曜周空遲三星没非怨杼
軸勞但念芳菲歇

歸鴻

昧旦濡和風
霑露踐朝暉
萬有皆同春
鴻雁獨辭歸
相鳴去澗汜
長引發江畿
皦潔登雲侶
連綿千里飛
長懷河朔路
緬與湘漢違

辭難潮溝

徘徊眷郊甸
俛仰引單襟
一塗不苟豫
百慮畢來侵
永懷交在昔
有願讐瑟琴
寯言勞者事
將用慰亡簪

謝莊

和元日雪花應詔

從候昭神世息燧應頌道玄化盡天秘凝功畢地寶笙
鏞流七始玉息承三造委霰下璇蕤疊雪翻瓊藻積曙
境寓明聯萼千里杲掩映順雲懸搖裔從風掃發貺燭
侄前騰瑞光圖表澤厚見身末恩踰悟生眇竦誠岱駕
肅側志梁鑾矯

七夕夜詠牛女應制

輟機起春暮停箱動秋衿璇居照漢右芝駕肅河陰容
裔泛星道逶迤濟煙潯陸離迎宵佩候爍望昏簪俱傾

環氣怨共歇，決年心珠殿。釭未沫，瑶庭路已深。夕清豈
淹拂，弦輝無久臨。

遊豫章西觀洪崖井

幽願平生積，野好歲月彌。捨簪神區外，整褐靈鄉垂。林
遠炎天隔，山深白日虧。游陰騰鵠嶺，飛清起鳳池。隱愛
松霞被，容與澗煙移。將遂丘中性，結駕終在斯。

自潯陽至都集道里名為詩

山經亟旋覽，水牒勑數尋。稽榭誠淹留，煙臺信遐臨。荆

州凝寒氣秋浦結清陰
眇眇高湖曠遙遙南陵深
青溪如委黛黃沙似舒金
觀道雷池側訪德茅堂陰
魯顯闕微迹秦良滅芳音
訊遠博望崖採賦梁山岑
崇館非陳宇茂苑豈舊林

北宅祕園

夕天霽晚氣輕霞澄暮陰
微風清幽幌餘日照青林
收光漸窗歇窮園自荒深
綠池翻素景秋槐響寒音
伊人儻同愛絃酒共棲尋

懷園引

鴻飛從萬里飛飛河岱起辛勤越霜霧聯翩遡江汜去
舊國違舊鄉舊海悠且長迴首瞻東路延翩向秋方登
楚都入楚關楚地蕭瑟瑟山寒歲去冰未已春來雁不
還風肅幌兮露濡庭漢水初綠柳葉青朱光靄靄雲英
英離禽喈喈又晨鳴菊有秀兮松有蕤憂來年去容髮
衰流陰逝景不可追臨堂危坐悵欲悲試託意向芳蓀
心綿綿兮屬荒樊想綠蘋兮既冒沼念幽蘭兮已盈園

天桃晨暮發春鶯旦夕喧青苔蕪石路宿草塵蓬門

山夜憂

庭光盡山明歸流風乘軒卷明月緣河飛澗鳥鳴兮夜
蟬清橘露靡兮蕙煙輕凌別浦兮值泉躍經喬木兮遇
猿驚南臯別鶴行佇漢東隣孤管入青天沈疴白髮共
急日朝露過隙詎賒年年既去兮髮不還金膏玉液豈
留顏迴舫拓繩戶收棹掩荆關

謝靈運

長歌行

候燦夕星流，昱奕朝露團。
榮榮烏有停，汙汙豈暫安。
徂齡速飛電，頽節騖驚湍。
覽物起悲緒，顧已識憂端。
朽貌改鮮色，悴容變柔顏。
疊疊衰期迫，靡靡壯志闌。
既慙臧孫慨，復愧楊子嘆。
寸陰果有逝，尺素竟無觀。
幸賒道念戚，且取長歌觀。

折楊柳行二首

鬱鬱河邊樹，青青野田草。
舍我故鄉客，將適萬里道。
妻

妾牽衣衿投淚沾懷抱還拊幼童子顧托兄與嫂辭訣
未及終嚴駕一何早負笻引文舟饑渴常不飽誰令爾
貧賤咨嗟何所道

騷屑出穴風揮霍見日雪颼颼無久搖皎皎幾時潔未
覺泮春冰已復謝秋節空對尺素遷獨視寸陰滅否桑
未易繫泰茅難重拔桑茅迭生運語默寄前哲

君子有所思行

總駕越鍾陵還顧望京畿躑躅周名都遊目倦忘歸市

鄧無阨室世族有高闈密親麗華苑軒薨飭通達孰是
金張樂諒由燕趙詩長夜恣酣飲窮年弄音徽盛往速
露墜衰來疾風飛飲生不歡娛何以竟暮歸寂寥曲肱
子瓢飲療朝饑所秉自天性貧富豈相譏

燕歌行

孟冬初寒節氣成悲風入閨霜依庭秋蟬噪柳燕辭楹
念君行役怨邊城君何崎嶇久徂征豈無膏沐感鸛鳴
對君不樂淚沾纓闔窗開幌弄秦箏調絃促柱多哀聲

遙夜明月鑒帷屏誰知河漢淺且清展轉思服悲明星

永初三年七月十六日之郡初發都

述職期闌暑理棹變金素秋岍澄夕陰火旻團朝露辛
苦誰為情遊子值顏暮愛似莊念昔久敬曾存故如何
懷土心持此謝遠度李牧愧長袖卻克慙躡步良時不
見遺醜狀不成惡曰余亦支離依方早有慕生幸休明
世親蒙英達顧空班趙氏璧徒乖魏王瓠從來漸二紀
始得傍歸路將窮山海迹永絕賞心悟

隣里相送至方山

祇役出皇邑相期憇甌越解纜及流潮懷舊不能發析
析就衰林皎皎明秋月含情易為盈遇物難可歇積疴
謝生慮寡憇罕所闕資此永幽棲豈伊年歲別各勉日
新志音塵慰寂蔑

過始寧墅

束髮懷耿介逐物遂推遷違志似如昨二紀及茲年緇
磷謝清曠疲繭慙貞堅拙疾相倚薄還得靜者便剖竹

守滄海枉帆過舊山山行窮登頓水涉盡洄沿巖峭嶺
稠疊洲縈渚連綿白雲抱幽石綠篠媚清漣葺宇臨迴
江築觀基曾巔揮手告鄉曲三載期歸旋且為樹枌櫨
無令孤願言

七里瀨

羈心積秋晨晨積展遊眺孤客傷逝湍徒旅苦奔峭石
淺水潺湲日落山照曜荒林紛沃若哀禽相叫囁遭物
悼遷斥存期得要妙既秉上皇心豈屑末代諠目覩嚴

子瀨想屬任公釣誰謂古今殊異代可同調

晚出西射堂

步出西掖門遙望城西岑連障疊巘崿青翠杳深沈
曉霜楓葉丹夕曛嵐氣陰節往感不淺感來念已深
羈雌戀舊侶迷鳥懷故林含情尚勞愛如何離賞心
撫鏡華緇鬢攪帶緩促衿安排徒空言幽獨賴鳴琴

登池上樓

潛虬媚幽姿飛鴻響遠音薄霄愧雲浮棲川怍淵沈
進

德智所拙退耕力不任徇祿反窮海卧疴對空林衾枕
昧節候褰開暫窺臨傾耳聆波瀾舉目眺嶇嶇初景革
緒風新陽改故陰池塘生春草園柳變鳴禽祁祁傷幽
歌萋萋感楚吟索居易永久離羣難處心持操豈獨古
無悶徵在今

遊南亭

時竟夕澄霽雲歸日西馳密林含餘清遠峰隱半規久
痾昏墊苦旅館眺郊歧澤蘭漸被徑芙蓉始發池未厭

青春好已觀朱明移戚戚感物嘆星星白髮垂藥餌情
所止衰疾忽在斯逝將候秋水息景偃舊崖我志誰與亮
賞心惟良知

遊赤石進帆海

首夏猶清和芳草亦未歇水宿淹晨暮陰霞屢興沒周
覽倦瀛壖況乃凌窮髮川后時安流天吳靜不發揚帆
採石華掛席拾海月溟漲無端倪虛舟有超越仲連輕
齊組子牟眷魏闕矜名道不足適已物可忽請附任公

言終然謝天伐

登江中孤嶼

江南倦歷覽江北曠周旋
懷新道轉迴尋異景不延亂
流趨正絕孤嶼媚中川
雲日相輝映空水共澄鮮
表靈物莫賞蘊真誰為傳
想像崑山姿緬邈區中緣
始信安期術得盡養生年

登永嘉綠嶂山詩

裹糧杖輕策懷遲上幽室
行源逕轉遠距陸情未畢澹

漱結寒姿團藥潤霜質澗委水屢迷林迴巖逾密眷西
謂初月顧東疑落日踐夕奄昏曙蔽翳皆周悉蠱上貴
不事履二美貞吉幽人常坦步高尚邈難匹頤阿竟何
端寂寂寄抱一恬如既已交繕性自此出

郡東山望溟海詩

開春獻初歲白日出悠悠蕩志將愉樂瞰海庶忘憂策
馬步蘭皋縹空息椒丘采蕙遵大薄蹇若履長洲白花
縞陽林紫鷺曠春流非徒不弭忘覽物情彌適萱蘇始

無慰寂寞終可求

石室山詩

清旦索幽異放舟越垌郊
萋萋蘭渚急藐藐苔嶺高
石室冠林陬飛泉發山椒
虛泛徑千載崢嶸非一朝
鄉村絕聞見樵蘇限風霄
微戎無遠覽總筭羨升喬
靈域久韜隱如與心賞交
合歡不容言摘芳弄寒條

齋中讀書

昔途遊京華未嘗廢丘壑
矧乃歸山川心跡雙寂寞
虛

館絕諍訟空庭來鳥雀卧疾豐暇豫翰墨時間作懷抱
觀古今寢食展戲謔既笑沮溺苦又哂子雲閣執戟亦
以疲耕稼豈云樂萬事難並歡達生幸可託

種桑詩

詩人陳條柯亦有美攘剔前修為誰故後事資紡績常
佩知方誠愧微富教益浮陽鶩嘉月藝桑迨閒隙踈欄
發近郭長行達廣場曠流始涖泉洒塗猶跬跡俾此將
長成慰我海外役

石壁精舍還湖中作

昏旦變氣候山水含清暉
清暉能娛人遊子憺忘歸
出谷日尚早入舟陽已微
林壑歛暝色雲霞收夕霏
芰荷迭映蔚蒲稗相因依
披拂趨南逕愉悅偃東扉
慮澹物自輕意愜理無違
寄言攝生客試用此道推

登石門最高頂

晨策尋絕壁夕息在山棲
疏峰抗高館對嶺臨迴溪
長林羅戶穴積石擁階基
連巖覺路塞密竹使徑迷
來人

忘新術去子惑故蹊活活夕流駛噉噉夜猿啼沈冥豈
別理守道自不攜心契九秋榦目翫三春萸居常以待
終處順故安排惜無同懷客共登青雲梯

從斤竹澗越嶺溪行

猿鳴誠知曙谷幽光未顯巖下雲方合花上露猶滋逶
迤傍隈隩迢遞陟陁岵過澗既厲急登棧亦陵緬川渚
屢徑復乘流翫迴轉蘋萍泛沈深菰蒲冒清淺金石挹
飛泉攀林摘葉卷想見山阿人薜蘿若在手握蘭勤徒

結折麻心莫展情用賞為美事昧竟誰辯觀此遺物慮
一悟得所遣

過白岍亭詩

拂衣遵沙垣緩步入蓬屋近澗涓密石遠山映跡木空
翠難強名漁釣易為曲援蘿聆青崖春心自相屬交交
止相黃呦呦食苹鹿傷彼人百哀嘉爾承筐樂榮悴迭
去來窮通成休憾未若長跡散萬事恒抱朴

夜宿石門詩

朝寒苑中蘭畏彼霜下歇暝還雲際宿弄此石上月鳥
鳴識夜棲木落知風發異音同至聽殊響俱清越妙物
莫為賞芳醕誰與伐美人竟不來陽阿徒晞髮

南樓中望所遲客

杳杳日西頽漫漫長路迫登樓為誰思臨江遲來客與
我別所期期在三五夕圓景早已滿佳人殊未適即事
怨睽攜感物方悽感孟夏非長夜晦明如歲隔瑤華未
堪折蘭苔已屢摘路阻莫贈問云何慰離析搔首訪行

人引領冀良覲

酬從弟惠連五首

寢瘵謝人徒滅跡入雲峰巖壑寓耳目歡愛隔音容永
絕賞心望長懷莫與同末路值令弟開顏披心胸

心胸既云披意得咸在斯凌澗尋我室散帙問所知夕
慮曉月流朝忌曛日馳悟對無厭歇聚散成分離

分離別西川迴景歸東山別時悲已甚別後情更延傾
想遲嘉音果枉濟江篇辛勤風波事歛曲洲渚言

洲渚既淹時風波子行遲務協華京想詎存空谷期猶
復惠來章祇足攪余思儻若果歸言共陶暮春時

暮春雖未交仲春善遊遨山桃發紅萼野蕨漸紫苞嚶
鳴已悅豫幽居猶鬱陶夢寐佇歸舟釋我吝與勞

登臨海嶠初發疆中作與從弟惠連可見羊何

共和之

杪秋尋遠山山遠行不近與子別山阿含酸赴修畛中
流袂就判欲去情不忍顧望脰未悁汀曲舟已隱

隱汀絕望舟驚棹逐驚流欲抑一生歡并奔千里遊日
落當樓薄繫纜臨江樓豈惟夕情斂憶爾共淹留
淹留昔時歡復增今日嘆茲情已分慮況乃協悲端秋
泉鳴北澗哀猿響南巒戚戚新別心悽悽久念攢
攢念攻別心旦發清溪陰暝投剡中宿明登天姥岑高
高入雲霓還期那可尋儻遇浮丘公長絕子微音

道路憶山中

采菱調易急江南歌不緩楚人心昔絕越客腸今斷斷

絕雖殊念俱為歸慮歟存鄉爾思積憶山我憤懣追尋
栖息時偃卧任縱誕得性非外求自己為誰纂不怨秋
夕長常苦夏日短濯流激浮湍息陰倚密竿懷故叵新
歡含悲忘春暖悽悽明月吹惻惻廣陵散殷勤訴危柱
慷慨命促管

入彭蠡湖口

客遊倦水宿風潮難具論洲島驟迴合圻岨屢崩奔乘
月聽哀狔浥露馥芳蓀春晚綠野秀巖高白雲屯千念

集日夜萬感盈朝昏攀崖照石鏡牽葉入松門三江事
多往九派理空存靈物杳珍怪異人秘精魂金膏滅明
光水碧綴流溫徒作千里曲絃絕念彌敦

入華子岡是麻源第三谷

南州實炎德桂樹陵寒山銅陵映碧澗石磴瀉紅泉既
枉隱淪客亦棲肥遁賢險徑無測度天路非術阡遂登
羣峰首邈若升雲煙羽人絕髣髴丹丘徒空筌圖牒復
磨滅碑版誰聞傳莫辯百代後安知千載前且申獨往

意乘月弄潺湲恒克俄頃用豈為古今然

初往新安桐廬口

締綌雖淒其授衣尚未至感節良已深懷古亦云思不
有千里棹孰申百代意遠協尚子心遙得許生計既及
冷風善又即秋水駛江山共開曠雲日相照媚景夕羣
物清對玩閒可憇

東陽溪中贈荅二首

可憐誰家婦緣流洒素足明月在雲間迢迢不可得

可憐誰家郎緣流乘素舸但問情若為月就雲中墮

何偃

冉冉孤生竹

流萍依清源孤鳥宿深沚蔭幹相經縈風波能終始
草生有日月婚奉行及紀思欲侍衣裳關山分萬里
徒作春夏期空望良人軌芳色宿昔事誰見過時
美涼鳥臨秋竟歡願亦云已豈意倚君恩坐守零落耳

湯惠休

怨詩行

明月照高樓含君千里光
巷中情思滿斷絕孤妾腸
悲風盪帷帳瑤翠坐自傷
妾心依天末思與浮雲長
嘯歌視秋草幽葉豈再揚
暮蘭不待歲離華能幾芳
願作張女引流悲繞君堂
君堂嚴且秘絕調徒飛揚

江南思

幽客海陰路留戍淮陽津
垂情向春草知是故鄉人

楊花曲二首

歲蕤華結情宛轉風含思掩涕守春心折蘭還自遺
江南相思引多嘆不成音黃鶴西北去銜我千里心

白紵歌

琴瑟未調心已悲任羅勝綺彊自持忍思一舞望所思
將轉未轉恒如疑桃花水上春風出舞袖逶迤鸞照日
徘徊鶴轉情艷逸君為迎歌心如一

秋風

秋風嫋嫋入曲房羅帳含月思心傷蟋蟀夜鳴斷人腸

長夜思君心飛揚他人相思君相忘錦衾瑤席為誰芳

楚明妃曲

瓊臺彩楹桂寢雕甍金閨流耀玉牖含英香芬幽藹珠
彩珍榮文羅秋翠紉綺春輕驟駕鸞鶴往來仙靈含姿
締視微笑相迎結蘭枝送目成當年為君榮

贈鮑侍郎

玳枝兮金英綠葉兮金莖不入君玉杯低彩還自榮想
君不相艷酒上視塵生當令芳意重無使盛年傾

伍緝之

勞歌二首

幼童輕歲月謂言可久長一朝見零悴嘆息向秋霜
迤邐已窮極痠疴復不康每恐先朝露不見白日光
庶及盛年時暫遂情所望吉辰既乖越來期眇未央
促促歲月盡窮年空悲傷

女蘿依附松終已冠高枝浮萍生託水至死不枯萎
傷哉抱關士獨無松喬期月色似冬草居身苦且危
幽生

重泉下窮年冰與澌多謝負郭生無所事六奇勞為社
下宰時無魏無知

蕭璟

貧士詩

四時迭來往苦辛隨事迫三冬泣牛衣五月披裘客遲
遲春日永憂來安所適季秋授衣節荷裳竟不易班超
棄筆硯婁敬脫挽輒雖云丈夫志終涉自媒迹賢哉顏
氏子飲水常怡懌

陸凱

贈范曄詩

折花逢驛使寄與隴頭人江南無所有聊贈一枝春

鮑令暉

擬青青河畔草

裊裊臨窗竹藹藹垂門桐灼灼青軒女泠泠高堂中明
志逸秋霜玉顏掩春紅人生誰不別恨君早從戎鳴絃
慙夜月紺黛羞春風

代葛沙門妻郭小玉作

明月何皎皎垂幌照羅茵若共相思夜知同憂怨晨芳
華豈矜貌霜露不憐人君非青雲逝飄迹事咸秦妾持
一生淚經秋復度春

題書後寄行人

自君之出矣臨軒不解顏砧杵夜不發高門晝恒關帳
中流熠燿庭前華紫蘭楊枯識節異鴻歸知客寒遊用
暮冬盡芳春待君還

寄行人

桂吐兩三枝蘭開四五葉是時君不歸春風徒笑妾

吳聲歌曲

碧玉歌

碧玉破瓜時郎為情顛倒芙蓉陵霜榮秋容故尚好
碧玉破瓜時郎為情顛倒感郎不羞郎回身就郎抱

讀曲歌

花釵芙蓉髻雙鬢如浮雲春風不知暑好來動羅裙

紅藍與芙蓉我色與歡敵莫案石榴花歷亂聽儂摘
打壞木棲牀誰能坐相思三更書石闕憶子夜啼碑
儂心常慊慊歡行由豫情霧露隱芙蓉見蓮詎分明
執手與歡別合會在何時明燈照空局悠然未有期
歡心不相憐慊苦竟何已芙蓉腹裏萎蓮汝從心起
種蓮長江邊藕生黃蘗浦必得蓮子時流離經辛苦
暫出白門前楊柳可藏烏歡作沈水香儂作博山鑪

烏夜啼

歌舞諸少年娉婷無種迹菖蒲花可憐聞名不曾識
辭家遠行去儂歡獨離居此日無啼音裂帛作還書
可憐烏白鳥彊言知天曙無故三更啼歡子冒闇去

石倉歷代詩選卷五